

Fossvogsskóli og aðgerðir vegna rakaskemmda

Tímalína

Veturinn 2018 – 2019

Ágúst 2018: Foreldrar barna við Fossvogsskóla vekja athygli á veikindum sem svipa mjög til veikinda sem rekja mátti til alvarlegra rakaskemmda í Kvistaborg árið áður. Leikskólinn er einn af leikskólum hverfisins. Með fulltingi skólastjóra er þess krafist að úttekt verði gerð á ástandi húsnæðisins vegna veikinda barna.

September 2018: Mannvit gerir úttekt á húsnæði Fossvogsskóla og tekur loftsýni til að kanna mygluvöxt. Mannvit telur ekki að hægt sé að fullyrða neitt um rakaskemmdir í húsnæðinu og leggur áherslu á að alþrif fari fram. Orðrétt segir í minnisblaði Mannvits: „Það er ekki hægt að fullyrða að engar rakaskemmdir séu í húsnæðinu, en líklega eru þær a.m.k. ekki miklar, séu þær einhverjar.“

Nóvember 2018: Heilbrigðiseftirlit Reykjavíkur tekur út húsnæði Fossvogsskóla og gefur því 4 í einkunn af 5. Gerir smávægilegar athugasemdir sem snúa að öðru en rakaskemmdum, en tekur að öðru leyti undir niðurstöðu Mannvits.

Desember 2018: Þrif framkvæmd skv. ráðleggingu Mannvits. Veikindi halda áfram eftir þrif. Foreldrar barna senda erindi á USK þar sem gagnrýnd er túlkun Mannvits á greiningu Náttúrufræðistofnunar Íslands á sýnum úr Fossvogsskóla. Foreldrar krefjast þess að farið verði í ítarlegri sýnatöku.

Janúar 2019: Skólaráð lýsir yfir stuðningi við gagnrýni foreldra og krefst þess bréfleiðis að SFS og USK fari í ítarlegri sýnatöku.

Febrúar/Mars 2019: Verkís fengið til að framkvæma ítarlegri snertisýnatöku. Skilar af sér úttekt sem staðfestir grunsemdir um miklar myglu- og rakaskemmdir. Tegundagreining á myglu hjá Náttúrufræðistofnun Íslands benda til að um mjög heilsuspillandi tegundir myglu sé að ræða. Skólanum lokað og starfsemi skólans flutt í Laugardal.

Vor/Sumar 2019: Framkvæmdir. Í skólabyrjun í ágúst 2019 eru tvær af þremur meginálmum skólans teknar í notkun (Meginland og Austurland). Ekki hafði verið gert við þær að fullu, t.a.m. var viðgerð á austurgafli Austurlands ólokið. Tilkynt að síðasta álman (Vesturland) myndi komast í notkun í nóvember.

Veturinn 2019 – 2020

Ágúst 2019: Foreldrar senda skólaráði erindi þar sem lýst er áhyggjum af heilnæmi safnkosts skólans. Erindið sent áfram til HER.

Haut 2019: Nokkrir nemendur verða fyrir afgerandi veikindaeinkennum í heimilisfræðistofu skólans, þrátt fyrir endurbætur á stofunni. Sterkur grunur um að orsök einkenna sé rakaskemmt efni. USK tafarlaust upplýst um málið og verkefnastjóri USK samþykkir sýnatöku. Stuttu síðar afturkallar deildarstjóri byggingadeildar USK samþykki með þeim skilaboðum að fleira verði ekki gert í

húsnæðismálum skólans. (Þegar sýnataka fór loks fram um 9 mánuðum síðar komu í ljós rakaskemmdir og mygluvöxtur víða í skólanum, sjá *rannsóknarniðurstöður_19júni2020* og *Yfirferð Fossvogsskóli júní 2020*)

Desember 2019: Rakaskemmdir koma í ljós í nýju lofti í Vesturlandi. Afhending frestast fram yfir áramót. Skólaráð sendir erindi á SFS og USK um veikindi barna í heimilisfræðistofu. HER gerir úttekt á heimilisfræðistofu og íþróttahúsi og gefur grænt ljós. Erindinu sjálfu var aldrei svarað.

Janúar 2020: Vesturland tekið í notkun. Svo til strax eftir að það er tekin í notkun byrjar nokkur fjöldi nemenda og starfsmanna að sýna sjúkdómseinkenni. USK lætur Mannvit mæla koltvísýring í lofti (sem segir vitanlega ekkert um mögulegar raka- og mygluskemmdir) og telur ekkert vera að húsnæðinu. Skólastjórnendur rýma húsnæðið engu að síður til að tryggja öryggi nemenda og starfsmanna, en í óþökk skóla- og frístundasviðs. USK setur fram áætlun um viðgerð á þakglugga, en telur að öðru leyti ekki ástæður til frekari framkvæmda. Ákveðið að ósonhreinna heimilisfræðistofu í vetrarfríi í febrúar til þess að bæta loftgæði, en ekki talið tilefni til sýnatöku eða frekari athugunar, þvert á ábendingar foreldra og skólastjórnenda.

Janúar 2020: Fulltrúar foreldra í skólaráði óska formlega eftir fundi við Skúla Helgason, formann Skóla- og frístundaráðs, og Líf Magneudóttur, formann Umhverfis- og heilbrigðisráðs. Erindinu var aldrei svarað.

Febrúar 2020: SFS tilkynnir skólastjóra að flytja eigi aftur inn í Vesturland án þess að fullnægjandi upplýsingar liggi fyrir um ástand húsnæðis. Skólastjóri dregur sig í hlé en fulltrúar foreldra og starfsfólks í skólaráði krefjast bréfleiðis upplýsinga um forsendur ákvörðunar SFS, upplýsingum um niðurstöður sýnatöku eftir framkvæmdir síðasta árs og aðgerðaáætlun vegna þeirra raka- og mygluskemmda sem hafði ekki verið sinnt. SFS dregur ákvörðun sína til baka en svarar ekki fyrirspurnum efnislega.

Mars og apríl 2020: Ósk fulltrúa foreldra og starfsfólks til SFS um upplýsingar ítrekuð þrisvar sinnum.

Apríl 2020: Fulltrúar foreldra í skólaráði leita til lögmannsstofu vegna tafa á upplýsingagjöf SFS. Lögmaður sendir erindi á borgarstjóra þar sem upplýsinga er krafist. Borgaryfirvöldum tilkynnt að fulltrúar foreldra muni bera kröfu sína undir úrskurðarnefnd um upplýsingamál verði henni ekki svarað. Kæra lögð fram vegna skorts á svörum.

Mái 2020: Erindi fulltrúa foreldra og starfsfólks loksins svarað, en afar takmarkaðar upplýsingar veittar. Tilkynnt að engar sýnatökur hafi farið fram eftir að framkvæmdum lauk árið 2019, þrátt fyrir fyrirheit um annað. Tilkynnt að framkvæmdum væri að mestu lokið. Lögmaður fulltrúa foreldra sendir annað erindi í nafni þeirra til SFS þar sem krafist er fullnægjandi viðbragða. Fulltrúar foreldra funda með umboðsmanni borgarbúa. Barn í 7. bekk skólans, sem sýnir mikil einkenni vegna myglu í skólanum, sendir erindi vegna málsins á umboðsmann barna.

Lok maí 2020: Eftir níu mánaða ferli þar sem ítrekað var óskað eftir samtali við borgaryfirvöld og upplýsingum um framkvæmdir er loksins fallist á að halda samráðsfund með með skólaráði. Á fundinn mæta fulltrúar SFS og USK og þar er ákveðið að ráðast í sýnatöku í skólanum á stöðum sem starfsfólk og nemendur hafa sýnt einkenni. Jafnframt ákveðið að sýnataka fari fram að loknum framkvæmdum.

Sumar 2020: Snertisýnataka staðfestir ítrekaðar ábendingar foreldra um að enn væri að finna raka- og mygluskemmdir í húsnæði skólans, þar með talið í heimilisfræðistofu. Jafnframt koma í ljós misbrestir í fyrri framkvæmdum við skólann, meðal annars vantaði hluta af rakavarnarlagi í þak Vesturlands. USK ræðst í framkvæmdir vegna þessa.

Veturinn 2020-2021

Ágúst 2020: Á samráðsfundi skólaráðs, SFS og USK er tilkynnt að framkvæmdum sé lokið og lokaúttekt hafi þegar farið fram. Fulltrúar foreldra krefjast þess að sýnataka fari fram aftur að loknum framkvæmdum, eins og samþykkt hafði verið í upphafi. Fulltrúar USK töldu slíkt óþarft og byggðu á faglegu mati Verkís. Að endingu ákvað USK að ráðast í sýnatöku og tegundagreiningu á nokkrum sýnum.

September 2020: Eftir að skólahald hefst á nýjan leik sýna nokkur börn enn einkenni vegna mygluskemmda. Sýnataka framkvæmd, m.a. í heimastofu tveggja barna sem sýna mjög áberandi einkenni. Sýni sýna óbyggjandi að hættulegar myglutegundir séu til staðar í húsnæðinu. Áður nefnd kennslustofa rýmd og snyrting endurnýjuð en þar fundust rakaskemmdir og virkur mygluvöxtur.

Lok september 2020: Samráðsfundur skólaráðs, USK og SFS þar sem lokaskýrsla vegna verksins kynnt. Fulltrúar heilbrigðiseftirlits Reykjavíkur mæta einnig. Sýnataka að loknum framkvæmdum benda til þess að enn hafi ekki verið komist fyrir vandann því enn finnst mygla. Tegundagreining bendir til að um mjög heilsuspillandi myglutegundir sé að ræða. Fulltrúar borgarinnar setja fram þá tilgátu að sýnin hljóti að hafa skemmst í flutningum(!). Engar mygluskemmdir sé að finna í skólanum eða þá að öll sú mygla sem finnist í skólanum komi utan að frá, t.d. með skóm starfsfólks og nemenda. Þrátt fyrir að sýni séu mögulega ónýt (að þeirra eigin mati) þá á engu að síður að afhenda lokaskýrslu og ljúka verkinu. Framkvæmdastjóri heilbrigðiseftirlitsins styður afgreiðslu borgarinnar eindregið. Fulltrúar foreldra og starfsfólks mótmæla þessu og sérfræðingur Náttúrufræðistofnunar Íslands hrekur málf lutning USK. Að lokum ákveðið að ráðast í alþrif á skólanum og sýnatöku í kjölfarið, ásamt því að hugað verði sérstaklega að nemendum sem sýna einkenni og reynt að tryggja að þau geti stundað nám sitt á meðan þessu ferli stendur.

Nóvember 2020: Fulltrúar foreldra óska eftir að sérfræðingur á þeirra vegum hafi aðkomu að sýnatöku að loknum alþrifum. Tillagan er sett fram til að auka traust á framkvæmd og niðurstöðum sýnatökunnar. Foreldrafélagið býðst til að standa straum af öllum kostnaði vegna sérfræðingsins. Erindinu var aldrei svarað.

Úrræðaleyzi borgaryfirvalda leiðir til þess að mjög veikt barn hrökklast úr námi við skólann og flýr í skóla í öðru bæjarfélagi. Lítið sem ekkert verið gert til að veita börnum sem þjást vegna ástandsins aðstoð á meðan enn er verið að vinna í húsnæðinu. Upplýsingabeiðni send fulltrúa USK stendur ósvöruð. Fulltrúar foreldra í skólaráði senda erindi á borgarstjóra og krefjast þess að sérstökum starfsmanni á vegum borgarinnar verði fengið það hlutverk að aðstoða börn og foreldra. Erindinu var aldrei svarað formlega.

Desember 2020: Erindi sent innri endurskoðanda, sem hefur nú verkefni áður hjá umboðsmanni borgarbúa, vegna vanrækslu borgarinnar á skyldum sínum gagnvart veikum börnum og hunsun ítrekaðra erinda, fyrirspurn og upplýsingabeiðna til borgarstjóra, SFS og USK. Innri endurskoðandi vísar málinu frá sér þar sem embættisbréf hans frá Reykjavíkurborg kemur í veg fyrir aðkomu hans að málum sem standa opin hjá borginni.

Um 15 sýni eru tekin í skólanum án þess að nokkurri fyrirspurn eða erindi í aðdraganda sýnatökunnar hafi verið svarað. Skólaráð ekki upplýst um stöðu mála.

Febrúar 2021: Á skólaráðsfundi þann 17. febrúar eru kynntar niðurstöður sýnatöku. Á fundinn mæta auk skólaráðs fulltrúar frá SFS, USK, Verkís, SAMFOK og Kennarasambandi Íslands, og sérfræðingur foreldrafélagsins í innivist Skólaráðsfulltrúar fá engin fundargögn fyrir fundinn. Á fundinum er farið

stuttlega yfir niðurstöður sýnatökunnar á skjá, um 40 glærur. Í nokkrum fjölda sýna ræktuðust upp varasamar myglutegundir. Fulltrúi umhverfis- og skipulagssviðs lýsir nokkrum aðgerðum sem farið verður í til að mæta vandanum. Engin fundargögn afhent á fundinum og lýsir fulltrúi Verkís því svo að þetta væri mikið magn efnis, yfir 100 blaðsíður, sem ekki væri hægt að afhenda að svo stöddu. Fulltrúar í skólaráði lýsa vantrausti á svið borgarinnar í málefnum Fossvogsskóla. Athygli vekur að minnisblað sem kynnt er, er dagsett um miðjan desember. Skólaráð ítrekar kröfu sína um aðkomu sérfræðings foreldrafélagsins að málinu. Fulltrúar USK á fundinum hafna þeirri aðkomu eindregið og telja borginni ekki fært að fá fleiri að verkinu. Fulltrúar foreldra ítreka bráðavanda þeirra barna sem ekki geta sótt nám sitt vegna veikinda tengdum húsnæði skólans. Engin svör fást við þeim vanda önnur en að SFS sé að reyna að ýta boltanum yfir á barnaspítalann.

Mars 2021: Fjöldi tilkynninga um veik börn sem rakin eru til veru í Fossvogsskóla eykst verulega og foreldrar halda æ fleiri börnum heima vegna einkenna. Málefni Fossvogsskóla rædd á borgarstjórnarfundi 2. mars. Borgarstjórn lofar bót og betrun. Þann 3. mars fréttu foreldrar af tilviljun af því að ekkert eigi að bregðast við greindri myglumengun í Austurlandi og framkvæmdum í Vesturlandi sé lokið að mati USK. Engar upplýsingar berast skólaráði né fundað með því. Brugðist við með bréfi til stjórnenda.

Boðað er til skólaráðsfundar 8. mars. Á fundinn mæta fulltrúar frá SFS, USK, Verkís, SAMFOK, sérfræðingur foreldrafélagsins og formaður skóla- og frístundaráðs. Nú kveður við annan tón. USK býður Sylgu Sigurjónsdóttur, sérfræðing foreldrafélagsins velkomna í vinnuhóp vegna vandans sem að steðjar að í húsnæði Fossvogsskóla. Skólaráð telur vandann ekki leystan til skemmri tíma. Nú sé fjöldi barna frá námi vegna veikindaeinkenna sem taka verði á. Formaður skóla- og frístundaráðs spyr fulltrúa foreldra á fundinum hver næstu skref eigi að vera. Foreldrar hafna þessari málaleitan og telja málið á forræði skólayfirvalda og þeim beri að ákveða næstu skref. Hvatt er til þess að haldinn sé almennur foreldrafundur sem fyrst og taka fulltrúar borgarinnar vel í þá málaleitan.

17. mars er haldinn almennur foreldrafundur. Kynnt er saga framkvæmdanna við skólann og að nú hafi sérfræðingur foreldrafélagsins verið fenginn að málinu. Reykjavíkurborg mun greiða fyrir þá þjónustu. Mikil reiði hjá foreldrum vegna afstöðu SFS um að halda nemendum áfram í hugsanlega menguðu húsnæði á meðan rannsókn fer loksins fram, um 5 mánuðum eftir að skólaráð lagði fyrst fram erindi þar sem rannsóknar var krafist. Fram er lagður undirskriftalisti vel á annað hundrað foreldra þar sem krafist er tafarlausrar rýmingar til að forða börnum úr aðstæðunum. Engin niðurstaða fæst á fundinum. Seinna sama kvöld tilkynna yfirvöld um rýmingu skólahúsnæðisins.

19. mars fara starfsfólk, fulltrúi SFS og skólaráð í vettvangsferð um húsnæði Korpuskóla sem fyrirhugað er að hýsi starfsemi Fossvogsskóla fram á vor. Í ljós koma rakaskemmdir í loftum í einni álmu húsnæðisins. Fulltrúar foreldra vekja athygli SFS á vandanum. Aðrir hlutar húsnæðisins eru teknir í notkun og hýsa starf 350 barna fram á vor í húsnæði sem í besta falli er hannað fyrir tæplega 200 börn. Efla fengin til þess að greina rakavandann og leggja til aðgerðir, sem snerust um fleiri svæði en sáust í fyrstu sjónskoðun. Hluti framkvæmda gerður í páskafríi en til stendur að ljúka framkvæmdum í Korpuskóla næstkomandi sumar og er hluti skólahúsnæðis því ekki í notkun.

Apríl 2021: Þann 6. apríl halda borgaryfirvöld tvo upplýsingafundi um rakaskemmdir í Korpuskóla og fyrirhugaðar framkvæmdir þar, annan fyrir starfsfólk og hinn fyrir foreldra. Fulltrúar foreldra í skólaráði óska eftir því að fá einnig að vera viðstaddir upplýsingafund starfsmanna í samræmi við samþykkt

skólaráðs um að allir fulltrúar þess séu viðstaddir alla upplýsingafundi um húsnæðismál, sé þess kostur. Skólastjóri hafnar beiðninni. Á fundi með foreldrum kemur fram óánægja foreldra með upplýsingaflæði og áhyggjur af stöðu húsnæðismála. Einnig spurt um stöðu rannsóknar á húsnæði Fossvogsskóla en engin svör fást. Gefin fyrirheit um reglulega upplýsingafundi með skólasamfélaginu á meðan ferlinu stendur.

Maí 2021: 26. maí er haldinn skólaráðsfundur með SFS, USK og Eflu. Efni fundarins er áfangaskýrsla um ástand Fossvogsskóla. Ljóst er að ekki verður kennt í skólanum næsta skólaár og sviðsstjóri SFS leggur til að skólaráð fái upplýsingar um möguleika til skólustarfs til umræðu á næsta fundi ráðsins. Fullyrt að skólustarf geti hafist aftur í Fossvogsskóla haustið 2022.

27. maí eru haldnir tveir fundir borgaryfirvalda, annar með starfsfólki og hinn með foreldrum. Þungt hljóð í báðum hópum og veruleg vonbrigði með frammistöðu USK. Þann 31. maí gefur starfsfólk Fossvogsskóla út yfirlýsingu þar sem sú ákvörðun um að starfsemi skólans haldi áfram í Korpu er hörmuð og óboðlegt sé að reka skólustarf Fossvogsskóla þar að óbreyttu. Vakin er athygli borgaryfirvalda á raunverulegri hættu á að atgervisflótti bresti á.

Júní 2021: Þann 2. júní er haldinn skólaráðsfundur. Velt upp möguleika að flytja að hluta inn í Austurland á árinu, eftir bráðabirgðaviðgerðir. Á fundinum er samþykkt orðsending til SFS þar sem hafnað er að fara inn í Austurland fyrir en öllum framkvæmdum er lokið í öllum byggingum. Boðið sé upp á fleiri valkosti í húsnæðismálum og gefinn rúmur tími til framkvæmda á sjálfu skólahúsnæðinu svo allri enduruppbyggingu ljúki áður en flutt er inn að nýju. Ítrekuð þörf á að byggja upp traust til borgarinnar með auknu samráði við skólasamfélagið. Að kvöldi sama dags er haldinn stjórnarfundur foreldrafélags Fossvogsskóla. Er þar samþykkt ályktun um aukið samráð við foreldra og starfsfólk. Skilaboðum frá skólaráði og ályktun foreldrafélags tekið fálega af SFS og auknu samráði í raun hafnað með svaraleysi.

4. júní berast foreldrum skilaboð frá SFS í gegnum RÚV þar sem þeim er sagt að Austurland verði tekið í notkun næsta vetur.

- <https://www.ruv.is/frett/2021/06/04/kennsla-gaeti-hafist-i-fossvogsskola-seinni-hluta-arsins?term=fossvogsskóli&rtype=news&slot=2>

5. júní upplýsist að yfirstjórn Reykjavíkurborgar hafi unnið markvisst gegn því að upplýsa og uppræta vanda í húsnæði Fossvogsskóla.

- <https://www.frettabladid.is/frettir/taldi-moursyki-geta-gripi-um-sig/>

8. júní er haldinn skólaráðsfundur. Eina tillagan sem liggur fyrir fundinum er að skólaárið 2021-22 verði starfsemi skólans alfarið í Austurlandi og færanlegum kennslustofum á lóð skólans, þrátt fyrir fyrri ályktun skólaráðs um Austurland. Verkefni skólaráðs sé að velja á milli tveggja hugmynda að staðsetningu færanlegra kennslustofa á lóð skólans(!). Skólaráð tekur ekki afstöðu til tillögunnar aðra en að lýsa aftur verulegum efasemdum um notkun Austurlands að svo stöddu. Skólaráð kallar eftir því að SFS og USK beri fram tvær tillögur að starfi, annars vegar í Korpu og hins vegar í Fossvogi, með kostum og göllum beggja staðsetninga. Lögð er áhersla á að gæði skólustarfs séu í fyrirrúmi í þeim tillögum. Sviðsstjóri SFS hafnar þeirri málaleitan og heimtar niðurstöðu án tafar frá skólaráði, þar sem embættismenn séu þegar að vinna eftir sinni eigin sviðsmynd.

7.-9. júní fer fram könnun foreldrafélagsins meðal foreldra um skólustarf næsta vetrar. Þeim umsögnum er miðlað til sviðsstjóra SFS og fleiri fulltrúa borgaryfirvalda. Á skipulagsdögum starfsfólks í lok skólaárs í júní fer viðamikil umræða fram um skólustarf næsta vetrar. SFS eru sendar niðurstöður þeirrar vinnu. Meginlína bæði foreldra og starfsfólks er sú að færa beri skólustarf sem allra fyrst í

Fossvoginn og alger einhugur er um að stíga ekki fæti inn í núverandi skólabýggingar fyrr en framkvæmdum er að fullu lokið. Fullkomið vantraust ríkir í skólasamfélaginu gagnvart stofnunum borgarinnar og yfirstjórn hennar eftir ítrekaðar þöggunartilraunir og hroðvirkni í framkvæmdum.

29. júní er gefin út stöðuskýrsla Eflu um ástand Fossvogsskóla. Ágallar á tveimur af þremur álmum hússins eru af þeirri stærðargráðu að lagt er til að einungis útveggir verði látnir standa eftir og húsnæðið endurbyggt að öðru leyti. Verulegar endurbætur lagðar til við þriðju álmuna. Skýrslan er skýr áfelliðómur fyrir vinnubrögð USK og afstöðu SFS til skjólstæðinga sinna.

30. júní er haldinn skólaráðsfundur. Auk skólaráðs eru mætti fulltrúar USK, SFS, SAMFOK, Verkís, Eflu, stjórn foreldrafélagsins og fleiri fulltrúar starfsfólks. Farið er yfir fyrirhugað skipulag á framkvæmdum við húsnæði Fossvogsskóla. Farið er yfir fjórar mögulegar sviðsmyndir um skólastarf næsta árið. Fimmta sviðsmyndin um allt starf í færanlegum stofum við Víkina rædd. Lagt fyrir SFS að endurskoða sviðsmyndir með hliðsjón af umræðum á fundinum og senda skólaráði til umsagnar. Á fundinum kemur fram skýr vilji foreldra og starfsfólks að 1.-3. bekk verði komið fyrir í færanlegum kennslustofum í Fossvogi, en engin niðurstaða fengin með eldri árganga.

Júlí 2021: Þann 15. júlí er haldinn skólaráðsfundur þar sem sviðsmyndir eru ræddar. Engin breyting hefur orðið á fyrri sviðsmyndum en þeirri fimmtu bætt við. Niðurstaða skólaráðs er að mæla með 1.-3. bekk í færanlegum stofum í Fossvogsdal frá hausti. Í 4.-7. bekk er ljóst að skólastarf verður að hefjast í Korpuskóla. Skólaráð tekur ekki afstöðu til sviðsmynda þeirra árganga fyrr en að loknum upplýsingafundi með foreldrum í árgöngunum fyrir skólasetningu. Ályktun komið á framfæri við sviðsstjóra SFS sem staðfestir skilning á ályktun með svarpósti.

22. júlí berst foreldrum tilkynning frá skólastjóra um að borgarráð hafi samþykkt að 1.-4. bekkur verði á lóð Fossvogsskóla næsta skólaárið og 5.-7. bekkur í Korpuskóla. Til stuðnings ákvörðuninni er skólaráð ranglega sagt styðja þessa niðurstöðu varðandi 5.-7. bekk, enda ekkert samráð haft við skólaráð um endanlega tillögu sem lögð var fram á fundi borgarráðs. Boðaðar eru á næstu vikum frekari upplýsingar um skipulag skólastarfs, sem unnið verði í samstarfi við skólasamfélagið.

Veturinn 2021-2022

Ágúst 2021:

Engar fregnir hafa borist um áætlanir yfirvalda um framkvæmdir við húsnæði Fossvogsskóla.

Þann 9. ágúst berst fréttatilkynning þar sem tilkynnt er að verið sé að leita lausna fyrir skólastarf 2.-4. bekkjar í samstarfi við Víking þar sem ekki takist að koma færanlegum kennslustofum fyrir í tíma. Ekkert samráð haft við skólasamfélagið.

11. ágúst er skólastjóri inntur eftir dagsetningu og skipulagi á upplýsingafundi fyrir foreldra 5.-7. bekkjar sem ákveðinn var af skólaráði í júlí. Skólastjóri segist vera búinn að biðja SFS um leyfi til að halda upplýsingafund skólaráðs.

18. ágúst tilkynnir skólastjóri að 2.-4. bekkur verði hýstur í kjallaraherbergi og anddyri í Víkinni, sem eru engan veginn heppileg til skólastarfs. Talsverðrar óánægju verður strax vart meðal foreldra og fundar stjórn foreldrafélagsins um stöðu mála strax sama kvöld. Á fundi fyrr þá viku fullyrða starfsmenn SFS á fundi skóla- og frístundaráðs að undirbúningur skólastarfs hafi farið fram í fullu samráði við fulltrúa foreldra og starfsfólks. Hið rétta er að ekkert samráð hefur verið haft við neinn utan stjórnenda skólans og fyrirkomulag skólastarfsins kemur öllum spánskt fyrir sjónir.

19. ágúst gefur stjórn foreldrafélagsins út yfirlýsingu til fjölmiðla þar sem húsnæðinu er hafnað, lýst furðu á seinagangi borgaryfirvalda og lýst vonbrigðum með samskiptaleyzi og vanhöld á að virkja skólaráð með lögboðnum hætti.

Seinna sama dag er boðað til skólaráðsfundar samdægurs þar sem fulltrúar SFS, USK og SAMFOKS, auk skólaráðs mæta. SFS lýsir ánægju með staðarval í Víkinni. Fulltrúar foreldra og kennara hafna notkun á Víkinni og leggja að skólayfirvöldum að finna tafarlaust heilnæmt húsnæði sem er hentugt til skólahalds. Fulltrúar foreldra benda skólayfirvöldum á húsnæði Hjálpræðishersins, en jafnframt er Safnaðarheimili Bústaðakirkju og Korpuskóli til umræðu. Engir formlegir valkostir liggja fyrir fundinum. Ákveðið að skólastjórnendur kynni sér betur valkosti sem eru í boði.

20. ágúst boðar SFS til könnunar meðal foreldra um val á milli Víkurinnar, Korpu eða Hjálpræðishersins fyrir 2.-4. bekk. Foreldrar fá engar upplýsingar um húsnæði Hjálpræðishersins og eru raunar flestir að heyra af því í fyrsta sinn þegar könnunin fer fram. Ljóst að engar forsendur eru fyrir því að taka ákvörðun með þessum hætti. Starfsfólk einnig látið velja á milli með handauppréttingu á vinnustaðarfundi. Hjálpræðisherinn verður fyrir valinu.

Stjórn foreldrafélagsins hafa borist nokkrar tilkynningar frá foreldrum um flutning barna úr Fossvogsskóla vegna stöðu skólans. Margar tilkynningar frá foreldrum hafa borist beint til SFS og skólastjórnenda um óánægju með málefni Fossvogsskóla.

30. ágúst eiga fulltrúar foreldra í skólaráði fund með mennta- og menningarmálaráðherra um málefni Fossvogsskóla. Á fundinum er reifuð óánægja foreldra með ítrekað viðbragðs- og úrræðaleyzi Reykjavíkurborgar og vanhöld á að tryggja börnum lögboðna menntun og aðstöðu til að sækja nám sitt. Foreldrar óska eftir að ráðuneytið hefji frumkvæðismál vegna stjórnsýslu Reykjavíkurborgar í þessu máli.

September 2021:

6. september sendir foreldri USK póst í framhaldi af fyrirspurn foreldrisins á fundi um húsnæðismálin 15. júní varðandi verklag varðandi viðhald eldri bygginga og asbest. Á síðustu fimm árum hefur USK í tvígang lagt minnisblað fyrir borgarráð þar sem lýst er yfir að fyrir upphaf framkvæmda í eldra húsnæði fari fram könnun á hvort asbest sé þar að finna. Aðspurðir könnuðust stjórnendur USK ekki við þetta verklag né að því hefði verið beitt fyrir framkvæmdir í Fossvogsskóla 2019. Í rannsókn Eflu vorið 2021 kemur í ljós að asbest er að finna í sólbekkjum í heimilisfræðistofu, sem teknir voru úr og settir aftur í í framkvæmdunum 2019. Í pósti foreldrisins er fyrirspurnin lögð fram formlega í þremur tölusettum liðum ásamt heimildum og skýringargögnum.

7. september er foreldrum tilkynnt að töf verður á afhendingu færanlegra kennslustofa við Fossvogsskóla. Áætlað er að í stað afhendingar 15. september verði þær afhentar í byrjun októbermánaðar. Ástæður sagðar tafir á afhendingu vegna kórónuveirufaraldursins og að endurbætur þurfi að fara fram þar sem þær henti ekki íslenskum aðstæðum. Foreldrar eru hvattir til þess að fylgjast með framgangi framkvæmdanna á sérstakri vefsíðu borgarinnar.

<https://reykjavik.is/framkvaemdasjain/fossvogsskoli-endurbaetur>

15. september kemur fram á skólaráðsfundi að hönnunarferli fyrir framkvæmdir sé í gangi og hafi verið í allt sumar. Búið sé að hanna klæðningu húsanna að utanverðu. Enginn fulltrúi framkvæmdaaðila mætir á fundinn og engin formleg gögn eða upplýsingar eru lagðar fyrir skólaráð.

27. september 2021 er staðan þessi:

- Enginn upplýsingafundur hefur verið haldinn um framkvæmdir í Fossvogsskóla, né upplýsingum miðlað með öðrum hætti til skólasamfélagsins frá 15. júní.
- Nýjustu upplýsingar á upplýsingasíðu borgarinnar um endurbætur bygginga Fossvogsskóla eru frá 23. september 2020.
- Enginn fundur hefur verið haldinn með foreldrum í 5.-7. bekk um framhald skólastarfs í vetur, líkt og ákveðið var á skólaráðsfundi 15. júlí, þar sem ekki fást fulltrúar SFS eða USK til þess að ræða möguleikana við foreldra á fundinum.
- Fyrirspurn til USK um brot á verklagsreglu vegna asbests við framkvæmdir í Fossvogsskóla frá 6. september hefur ekki verið svarað.
- Engar framkvæmdir við endurbætur eru hafnar við skólann, fyrir utan að asbest hefur verið fjarlæggt, og ekkert vinnusvæði verið afgirt fyrir framkvæmdir.

*Tekið saman af fulltrúum foreldra í Fossvogsskóla.
Síðast uppfært 27. september 2021.*